

Namminersorneq pillugu kalaallit qallunaallu isumalioqatigiissitaat

Nuummi allaffeqarfik

14. maj 2008

Inatsisartut inatsisinik atortitsinermik ataatsimiititaliaat

Inatsisinik atortitsinermik Inatsisartut ataatsimiitittaliaata allattaata 13. maj 2008 allakkatigut namminersorneq inunnit taasissutigineqalerpat taasinermi tunngaviusussamik oqaaseqaqqullunga qinnutigaa. Akinissamut piffissarititaasoq sivikeqimmat taamatuttaaq naatsumik akissuteqassaanga:

Apeqqutinik inuiaqatigiinnut pingaaruteqarluartunik qinersisartut taasitinneqassatillugit pingaaruteqarpoq apeqqutip taasinermi tunngaviusussap sapinngisamik ersarissuunissaa naatsukullaanissaalu, tassa taasissussat taasiartussasut nalornisiginagu suna angissanerlugu naaggaassanerluguluunniit. Allatut oqaatigalugu apeqqut qulequtaannaasariaqanngilaq.

Eqqaamavara 1960-ikkut aallartilaartut nunaannarmi inatsisissatut naalakkersuisut siunnersuutaat Danmarkimi qinersisartunit taasissutigineqassammata siunnersuutitut akerliusut tunngavilersuutit imaangajattut sunniuteqaqisumik atoraat: "Nalorniguit naaggaarit!"

Namminersorneq nunatsinni qinersisartunit taasissutigineqalerpat kissaatiginaqaaq namminersorneq qanoq imalik qanorlu piumasaqaatitaqartoq qinersisartut paasilluarlugu isummerfigissagaat. Inatsisinik atortitsinermik ataatsimiititaliap taasissutigineqartussat allannguutissaatut siunnersuutaa taassuma tungaanut alloriarnerugaluartoq isumaqarpunga sulisarsinnerulersinneqarsinnaasoq ima oqaasertaleraanni:

Kissaatigaajuk Kalaallit Nunaanni namminersorneq Namminersorneq pillugu kalaallit qallunaallu isumalioqatigiissitaasa namminersornermik inatsisissatut missingiusiaattut imalik piumasaqaatitaqartorlu eqqunneqassasoq?

Taamatut siunnersuuteqarninni tunngavigaara inatsisissatut missingiusiaq isumalioqatigissitanit nunatsinneersunit tamarmiusunit aammalu ilaasortanit Danmarkimeersunit tamarluinnangajannit isumaqatigineqarmat ilimanaranilu ukiup affaata missaata ingerlanerinnaani isummat allanngungaarnaviannigitsut. Aamma eqqaamasariaqarpoq namminersornerulernissaq januarimi 1979-imi inunnit taasissutigineqarmat taasissutigisaq tassaasoq namminersornerunermik inatsit Folketingimit akuersissutigineqartoq.

Inussiarnersumik inuulluaqqusillunga

Jakob Janussen
allattoqarfimmi pisortaq